



Na h-Eileanan Aranach

(Irish Times)

gnothach an Cill Rònain deònach air barrachd air cóig ar fhichead a thoirt air. Chùm iad air a chéile fad dhà uair an uaireadair, ach b'éiginn do fhir Conamara géilleadh. Bha iad ag innse dhomh a rithist gur e Albannach a bha an athair an fhir a Cill Rònain!

Bha e mar so mu chóig uairean feasgar mus tug sinn ar n-aghaidh air Conamara. Cha robh deò gaoithe ann, agus bha sinn fada bho'n dachaidh mu ochd uairean an uair a dh'atharraich an aimsir, agus a dh'éirich doineann le tàirneanaich agus dealanaich. Mu aon uair deug thug sinn a mach fasgadh eilein bhig am bàgh Ghaillimh. Bha na tàirneanaich a' sìor tharraing dlùth, gus mu dheireadh gu robh e, ar linn, eucomasach dhuinn tèarnadh bho'n dealanach. Thug an so fear de na bràithrean botal de uisge coisrigte a mach agus fhuair sinn ar baisteadh an ainm an Athar, a' Mhic agus an Spioraid. Bha mise 'gam fhaireachdainn fhéin a nis car mar a bha Iòna 'san luing! Mu uair 'sa' mhadainn chaidh sinn air tìr agus ghabh sinn fasgadh ann an tigh 'san eilean. Bha luchd céilidh an sin nach d'fhuair cothrom a dhol dhachaidh leis an stoirm agus bha sinn an sin a' comhradh agus a' tuiteam 'nar cadal gus an robh e ceithir uairean 'sa' mhadainn. Bha sìde na b'fheàrr ann a nis agus chuir sinn ar n-aghaidh a rithist air Conamara. Ràinig sinn an tigh mu ochd uairean 'sa' mhadainn agus gun fuireach ri biadh no dad eile rinn mi air an leabaidh agus chaidil mi gu cóig uairean feasgar. Là-rna-mhàireach bha mi a' dol a steach a Ghaillimh air bus, agus bha cailleadh a' faighneachd dhomh a robh eagal orm roimh na tàirneanaich agus na dealanaich an oidhche eile. Thubhairt mi fhéin nach robh mórán. "A! is mi nach eil 'gad chreidsinn,'" arsa ise," 's gun thu dhe'n chreud cheart co dhiùbh."